

靜
志
居
詩
話

靜志居詩話卷十八

秀水朱竹垞先生著

扶荔山房編輯

譚清海字永明東莞人有靈洲詩草

處士以布衣思自奮功名永陵時上言十事不納穆宗
卽昨復走京師進三大禮疏其略曰我太祖高皇帝文
德武功前此未有一傳至建文君紛更法制文皇帝於
是訓兵除之卽位之後悉復洪武舊制夫成祖未卽位
之先建文君天下者也四年以來其措置雖不足觀然
有一日之君必有一日之政事而使之湮沒不傳將來

者何以徵也且洪武三十一年爾今日三十五年豈賓天之後猶能撫綏四海統理萬幾此非所以示信也陛下宜勅令史官修其一朝實錄仍以建文年號復告高廟而追諡之庶幾文獻足徵可以信今而傳後矣又按正統十四年也先入寇大同失利太監王振不與大臣謀議獨挾天子親征命郕王居守師駐土木天子蒙塵京師大震皇太后召百官入集闕下命郕王權總萬幾旣而復命郕王宜早正位蓋以時方多事國賴長君故也王涕泣固辭於時文武羣臣交相勸進然後不得已

卽皇帝位夫土木之難非國家大變哉當是時社稷爲重君爲輕使非景皇帝預登大寶臣恐天下之事難言矣况多難之秋篤任于謙選將擇能練兵主戰宗社不至於南遷伊誰之功歟及英宗皇帝駕還景皇帝迎拜相持而哭推遜良久授受之意昭如日星一旦不豫英宗復位此天之所順也人之所歸也而賊臣徐有貞輩邀貪天功以爲己功首倡奪門動搖國本駕言定策獵取侯封構骨肉無已之禍端損國家萬年之元氣遂使景泰七年君臨天下之號一旦改除于謙社稷之臣竟

死刀下每讀國史流涕傷心不能不飲恨也英宗復鑒其誣深懷怨悔未及改遽爾上賓憲宗敦念親親用成先志上尊諡曰恭仁康定景皇帝然而未得稱宗未饗太廟歷朝因循實爲缺典夫人臣有功於國者猶得附饗於廟而況正位於九重之上七年之間社稷攸賴德在天地功在祖宗不幸晏駕一二讒賊之臣迺隨而媒孽之遂至不得以列羣宗而安廟祀孔子所謂正名之義安在今陛下卽位之始宜明詔中外尊爲某宗祔祀太廟以正一代昭穆之倫以敦萬世宗親之義仍以于

謙配饗用報有功復勅有司震暴有貞之罪削其官爵
夷其墳墓以爲將來不忠之戒庶幾祀典可明而典刑
可正矣又按太祖高皇帝首建太廟爲同堂異室之制
而奉元恒裕淳四帝居之成化間九廟已滿下詔議祧
於是以元皇帝爲始祖以太祖太宗爲世室於寢殿後
建祧廟羣主以次遷入焉至嘉靖十七年先帝斷自宸
衷獨奉高皇帝爲不遷之祖改號太宗爲成祖復上獻
帝爲睿宗而竝附九廟祀焉夫太祖有功於天地創業
垂統爲萬世計尊之爲始祖禮之正也獻帝篤生聖子

入繼天朝我先帝一念報本之心不能自己而尊之爲
帝祀以天子之禮此猶可以義起者若升祔九廟而與
列聖竝饗臣不知於義何取於禮何居天下之分奚辨
乎昔武王纘太王王季文王之緒以有天下是天下者
太王王季文王之天下也故武王得以追王太王王季
文王也猶我太祖之追尊四祖也今先帝所嗣之緒果
纘之獻帝乎抑纘之祖宗列聖乎使纘之祖宗列聖則
先帝之天下祖宗列聖之天下也先帝不得而私其親
也今饗其親於九廟之中則是先帝之天下旣受之祖

宗列聖矣而復受之獻帝謂非有兩統乎此一人之私也非天下萬世之公也我朝之制子爲天子其母稱太后不稱后不得竝嫡同饗於是有奉慈之殿所以明微也陛下謂君臣之分與嫡庶之分奚殊焉獻帝本安陸之藩王曾北面於武宗者今升祔九廟而與羣宗竝列則是儼然居武宗之上矣爲天子之母者不可以庶而竝嫡爲天子之父者獨可以臣而尊君哉臣聞獻帝在藩邸時克遵朝廷制度惟謹天下稱順焉故於其崩也而武宗諡之曰獻夫生而能恪守藩臣之禮未有死而

肯倒置冠裳者也今儼然居武宗之上臣恐獻帝在天
之靈必以上下之分不可踰也禮義之防不可越也祖
宗相傳之統不可私也將感然不安於其位矣夫祭者
所以安先人之神也旣感然不安於其位則又何愛於
附饗何取於太廟哉陛下方將秉正奉公爲天下矜式
必不以私親之故而廢禮其勅禮部會多官集議再訂
廟儀務求典禮之正庶於祖宗祭統不至生嫌獻帝神
靈得以安饗而亦不失先皇尊親報親之心祀典由是
而正禮義由是而安天下之分由是而辨而萬世人心

之公定於此矣以上三事皆言人之所不敢言且倡議
於楊時喬詹沂劉曰梧歐陽調律諸臣之先而實錄不
書野史失載故節錄之處士善談兵見知於戚少保歸
隱羅浮見日峰鄉里稱爲見日山人

楊承鯤字伯翼鄞人太僕卿美益子國子監生有
西清閣詩草

伯翼論文謂先民有作穀率存焉不入穀率雖工無當
也論詩厭薄王李謂暗中摸索知爲今人之詩惟誦之
不類今人而不蹈古人之迹斯善矣譬如學書然方其

心慕手追必盡肖古人及其成也不必盡肖乃成家可
稱知言者也寄題江心寺云勝絕江心寺江空塔影長
潮痕剝斷石海氣溼危廊僧老秋無寐鵬寒翅有霜英
雄餘涕泗風雨弔殘陽

沈懋嘉字會真平湖人懋孝之弟諸生有白巖遺
藁

吾鄉屠康僖墓在乍浦陳山山濱海宰木蒼鬱每東風
起有鳥海外來集於樹土人張羅持竿捕之大者曰戴
毛鷹亦曰鷓鴣中者曰花雞小者曰鑽籬剖其腹有青

椒其骨甚脆號爲秋鳥文學詩云陳山西麓海東頭細
網長竿帶綠鞬買得山禽如粉脆屠墳十里稻花秋蓋
紀其實

陳有守字達甫休寧人有六水山人詩集

山人好游轍跡遍湖海以郡有南浦六州水胥匯於川
注海遂自號六水山人一日天瀛山人又曰斗下老人
自比沈麟士王孺仲其詩取材目前不甚鎔鍊所選徽
郡詩斤斤繩墨不失正音

盛時泰字仲交上元人貢生有蒼潤軒集

沈啓南題倪元鎮畫云筆蹤要是存蒼潤畫法還應入
有無盛仲交畫師元鎮文徵仲遂以蒼潤題西冶城之
小軒仲交性愛山水去郭二十里爲攝山山之左有大
城山結精舍其中時跨一青驪欣然獨往嘗爲子娶婦
其妻戒勿他往忽隨友人往城南古寺數日乃還妻慍
而詈之乾笑而已張肖甫開御史臺於句容仲交醉搥
戟門之鼓肖甫曰安得此狂生必盛仲交也邀入復飲
達旦乃別萬歷初元以陪貢試吳下肖甫謂日子過姑
蘇宜一謁王元美遂攜所著兩都賦謁元美於小祇園

元美贈之詩曰遂令陸平原不敢賦三都又三日之內
遍和元美擬古詩七十章元美爲之氣奪云

孫文旒字伯諧歙人

附錄王仲房云伯諧好神仙山居獨行洞簫在佩不
顧俗人訕笑其詩任性放吟嬾於祖述間有合作便
超凡情若行人欲問前朝事翁仲無言對夕陽足稱
佳句

欽叔陽字遇公吳縣學生入國子監有集

太監孫隆以督織造駐蘇州朝廷方起稅額惡少年行

賄充委官乘輿張蓋勒索商稅民不堪命崑山人葛成
率衆二千人分作六隊一人搖蕉扇前行後執梃隨之
知長洲縣事鄧雲霄見民情洶湧擒委官頭目械於元
妙觀衆立毆死裂其尸知府朱燮元勸諭始得解散此
萬歷二十九年事也時葛成慷慨就獄後得宥罪又二
十餘年而有顏佩韋等實先啓其兆云遇公謠凡一十
三首茲錄稅官謠三首其一云四月水殺麥五月水殺
禾茫茫阡陌殫爲河殺禾殺麥猶自可更有稅官來殺
我其二云千人奮梃出萬人夾道看斬爾木揭爾竿隨

我來殺稅官其三云稅官來百姓哭虎負嵎猱升木壯
士來中貴走十二人三授首歡樂崇朝不及夕倏忽頭
顱已狼籍投畀烏鳶烏不食蓋音節特近古者

張名由初名凡字公路蘇州嘉定人有張公路詩
集

公路居平世而好言兵棄家產僮僕以避徭役可稱知
幾之士蓋先唐婁程李四子稱詩而學文於震川者古
貝辭云禹貢故江道今已失其真西亂北入襲浦東接
春申中淤百餘里高飛起黃塵三年棄不治地頗生理

殷九夏耨耨出三時雨露新
吉貝萬餘頃其葉何蓁蓁
秔稻產三吳初不係海濱
陵谷日變遷造物亦至仁
嗟肉食謀此理難具陳

俞安期初名策字公臨既更今名改字羨長吳江
人有寥寥集

羨長之名由元美明卿伯玉而成詩亦兼綜三家原本
李獻吉長於獵祭賦景有餘言情不足如入隋苑觀剪
綵花青紅碧綠非不爛然奪目卽而視之與根株總不
相附

附錄朱雲子云羨長語多雄壯如望海云星臨東極
無分野山入南荒有沃焦廬山絕頂云爭趨大海千
江定纔入中峰兩郡分寄臨洮監司云桃花東道來
天馬木葉西山見玉狼寄建昌兵備云笮馬全教歸
漠北竹王那許擅南中皆名貴可傳

何白字无咎永嘉布衣有汲古堂集

无咎起於側微事容有之第考萬曆庚辰補歷龍君御
初授徽州府推官鑄級改溫州府學教授入爲國子博
士未嘗任溫州司李也錢氏殆亦道聽之說汲古堂集

原亦出於七子頗與俞羨長相近

附錄愚山云无咎幼時爲郡小史龍君御爲郡司理
異其才爲加冠集諸名士賦詩以醺之爲延譽於海
內遂有盛名

黃克晦字孔昭惠安人有黃孔昭詩選

孔昭少爲畫工壯歲以詩名其金陵游橐則張仲立刊
之西山唱和編則李于美定之金臺詩則林登卿鐫之
登卿稱其古風天籟自鳴近體森然紀律青溪社集諸
公允當推爲祭酒聽話西苑云雷殿清虛太液秋至尊

多在望仙樓樹深宮闕東西合月出波光下上流麟圃
紫芝春曄曄兔園白鹿曉呦呦軒皇鼎在龍髯斷露箔
風簾不上釣病中風雨寄歐楨伯云薊門衰病颯驚秋
風雨蕭蕭獨倚樓四海新知名下老頻年多病客中愁
雲連北極迷宮樹水發西湖出御溝京國逢君歡不淺
可憐經月罷同游欸乃曲云五虎山如五虎蹲盡對無
語舊國門無諸去後山空在秋草蕭蕭日又昏微茫星
月下江鄉三十六灣江水長夜半舟人相借問好風日
出到洪塘

鄭琰字翰卿閬縣人

翰卿詩名籍甚興致超七言近體全得力於唐詩鼓吹者贈顧小侯云甲第連雲瞰帝城畫簾繡箔照朱甍新開馳道千金埒舊領團營七較兵方士房中龍虎鼎侍兒花底鳳凰笙燕山二月春初好玉勒朝朝待曉鶯黃山道中云微霜風物色淒淒路入黃山是五谿帝子不歸汾水上行人愁過穆陵西荒原曉露銅駝泣古驛秋風鐵馬嘶獨客傷神家萬里斜陽征雁楚天低

胡宗仁字彭舉上元人有知載齋稿

彭舉詩頗清真惜橐爲楚人論定必去其菁華僅存皮骨矣

附錄愚山云彭舉隱冶城山下本富家子老而食貧不謁時貴畫師子久雲林嘗詠唐六如詩閒來自寫青山賣不使人間作業錢殊自得也有詩二千餘首鍾伯敬爲論定每自誇其寒星徹夜疎明月爲我至以爲神來之句亦可見其清思也

林世璧字天瑞閩縣人有彤雲集

天瑞爲龔祭酒用卿女壻嘗從婦翁游鼓山分韻賦詩

時天瑞已醉詩成題壁有眼中滄海小衣上白雲多之
句坐客皆歎以爲不及徐惟和詩云閒尋老衲叩禪堂
墨跡淋漓滿上方一自題詩人去後白雲滄海兩茫茫
蓋爲天瑞作也覽彤雲集終卷才雖敏而調實庸

汪廷訥字無如休寧人有環翠堂集

無如耽情詩賦兼愛填詞結環翠亭酒讌琴歌與湯義
仍王伯穀諸人游興酣聯句嘗集唐人詩云狎鳥無機
任往來一川晴色鏡中開竹間駐馬題詩去松下殘碁
送客回綠樹碧檐相掩映落花飛蝶共徘徊物情多與

閒相稱莫惜芳時醉酒杯製百家衣可云無縫者已

朱應龍字舜夔一字近臣鄞人有東籬樂府

東籬與沈明臣葉太叔盧澐齊名號明州四傑乘月飲
海上大醉溺死其短歌行云皎皎月明駕言宵征唯君
之故不遑自寧說者以爲近於讖也

葉太叔字鄭朗晚更名亭立改字介子鄞人有思

烟集藏山藁

葉君嘉則弟子別裁詩派小築一律云性本耽篇籍尤
憐誦絕交先生號東郭小築近西郊花霧侵衣袂茶烟

亞竹梢坐行都自適好鳥語咬咬

嵇元夫字長卿歸安人有白鶴園集

長卿父編修世臣嘉靖辛丑分校禮闈高文襄出其門
長卿少年簡傲獲罪嘉興某推官坐死文襄營救獲免
招入都執其手語朝士曰此天下才也及文襄去位乘
牛車出國門次日始有馳傳後命長卿盧溝送新鄭相
公詩云單車去國路悠悠綠樹鳴蟬又早秋燕市傷心
供帳薄鳳城回首暮雲浮徒聞後騎宣乘傳不見羣公
疏請畱三載布衣門下客送君垂淚過盧溝蓋紀其實

也一時傳誦謂陽關三疊河滿一聲無此淒楚比還里
困甚歲暮大雪李給事樂語家人曰此時嵇公子必大
困因載酒熾炭權舟從之見嵇方坐涯次酌水相與劇
飲而別茗中傳爲佳話云

盛鳴世字太古鳳陽人國子監生有谷中集

太古五言圓潤貼妥其源出於郎士元贈隱者云只在
高霞外無人識去蹤伴猿栖一室放鶴下孤峰丹竈雲
中火青天夜半鐘平生長往意相望不相從七月八日
潞河舟中別長安諸子云天漢龍初返星橋鵲乍分隔

河收片雨宿浦有殘雲復作孤舟別兼悲一葉聞柁看
此時恨不獨在離羣

何璧字玉長福清人

玉長任俠見知於黃陂張濤張後開府遼東將疏薦以
布衣拜大將會罷鎮乃止濤卒入楚哭之遂以病死亦
矜奇之士也寄友詩云士到出山誰不賤術惟游世最
難工足當阮生之泣矣西湖尋曹能始云垂楊漠漠行
田田何處春風十四絃放鶴僧歸三竺雨聽鶯人過六
橋烟詩尋蘿薛誰邊寺酒載桃花第幾船游子天涯魂

易斷非關春樹有啼鵲

汪樞字伯機鄞人有存侯篇

伯機世祿之家不樂仕進治別業曰泡園賦園居詩六十首閩人徐興公極稱之懊懣曲云千金買妾身一旦遠行邁大鰲如屋寬底事不相載

沈瑞徵字靈繹海寧學生有慧居遺集

先生五言如落木悲秋氣浮雲起夕陰雁聲春半少寒色雨中多野犬迎人吠流鶯隔樹聞雪鷗輕片片烟樹遠冥冥竹翠侵衣溼峰陰入戶涼高者近大歷十子下

亦不失爲四皇甫也惜年未四十而沒遺詩一卷孫翰林編修珩刊行之

江禹奠字其永休寧人僑居吳縣國子監生有元芝館詩集

其永與王伯穀共肄業於留都而詩名未振然其五言清切如秋雨半沈閣夕陽已在山落葉半庭月啼烏滿屋霜寺出寒烟外山沈細雨中雨洗松根石雲開屋後山山影隨帆轉溪聲挾雨飛久有青山志因歌白露詩頗類鵝池生

姚旅初名鼎悔字園客莆田人

園客放浪湖海綴拾舊聞露書一編頗存軼事其評隲一時詩家遠比敖器之近續王元美

汪功胄字介夫休寧人有介夫存橐

介夫大呂之子善詩而天存橐二卷大半學李長吉春日閒居云韶景當春半閒居覽物華綠分當戶竹紅過隔牆花樵牧依林近溪山帶郭斜閒身甘自放吟臥寄烟霞

周應辰字斗文鄞縣學生有綠莊詩采

清江先生詩集 卷一
緣莊游鄒南臯之門南臯問曰使周生爲仲尼弟子將
誰學對曰某小人願學樊須聞者以爲善於說辭閩人
林古度序其詩稱其色古而骨堅

沈木字子喬嘉興人萬歷間縣學生有近竹臺

子喬自號靜得逸人夜起一詩具臻佳境其詞云暑夜
不成寐起步中庭中殘月忽墮水明河猶在空籬根滴
清露樹杪生微風坐愛新涼好先秋有候蟲

丁雲鵬字南羽休寧人有丁南羽集

南羽工畫其寫神王羅漢骨氣奇偉不減大小尉遲詩

特具體而已舟次尤溪云客程迷水國山靄護城闌歲
涉三冬暮花先十月春魚鹽通海取橘柚落園珍故舊
頻勞慰荒塗未厭貧

方于魯初名大澈後以字行改字建元歙布衣有

佳日樓詩集

古人製墨率用松煙漢取諸扶風晉取諸廬山唐則易
州上黨自李超徙歙張谷徙黟皆世其業其後耿仁遂
高慶和戴彥衡吳滋胡智率多歙人明則羅文龍少華
邵克已格之程大約君房輩咸以製墨稱而于魯所製

最夥上自符璽圭璧下至雜珮凡三百八十五式刊成
圖譜會上呈乙覽所造雲箋匪止成都十樣嘗以百花
香露和墨自作長歌世但目爲墨工然汪伯玉曾招之
入豐于社送張山人歸越云雉子斑斑麥正齊黃梅四
月雨淒淒新安江上攜尊酒送爾看山到浙西

錢允治初名府後以字行更字功父長洲人穀子
有少室先生集

功父勤於汲古詩篇特勝乃翁同汪魯二將軍登寶山
看海云地軸東虧接混茫空明何處是扶桑青山一點

孤城黑碧月半輪殘照黃橫海樓船天漠漠隔沙烟樹
水蒼蒼野夫却喜狼烽息醉飲將軍寶燾旁喜汪伯耳
自桂林歸見過云金雞未放詎言歸細雨衡門忽款扉
萬死可憐惟舌在一官寧論與心違藤江瘴癘人行少
桂嶺風烟客住稀相見祇疑如夢裏濁醪不醉淚沾衣
周履靖字逸之嘉興人有梅墟雜橐

逸之夫婦能詩門內唱和鈔撮戶門廣牘刊行亦好事
者流蓋先寒山趙凡夫偕隱者江上竹枝詞云夜來春
雨溢春田江上蘼蕪遠接天赤脚漁娃晨入市柳條帶

雨串銀鰯

唐時升字叔達嘉定人有三易齋集

嘉定四先生詩文要當推叔達第一長蘅子柔且遜席
矧孟陽乎錢氏謂其放筆而成繹其辭乃追琢而出者
由其欲伸孟陽故有意抑之爾

附錄愚山云叔達詩皆放筆而成語不加點遇其得
意才情颺發雖苦吟腐毫之士無以加也其文縱橫
踔厲深惡艱深塗澤之作自命其集曰三易四明謝
三賓知縣事合孟陽子柔長蘅之詩文鏤板行世題

曰嘉定四先生集

婁堅字子柔嘉定人貢生有吳歛小草

練川三老子柔古風獨勝祁之柳二章分寄君實伯隅
云祁之柳其葉油油自我送子于祁之洲佇立望之莫
知我愁豈不能言以寫綢繆我言斯永我心則憂乃如
之人洵美且修我之所臧人以爲尤祁之柳其葉爛爛
自我送子于祁之畔佇立望之莫知我怨豈不能言以
寫慨歎我言之長我心則亂乃如之人洵美且燦人之
所榮子以爲患

程嘉燧字孟陽休寧布衣僑居嘉定有松圓浪淘
集

孟陽格調卑卑才庸氣弱近體多於古風七律多於五
律如此伎倆令三家邨夫子誦百翻兔園冊卽優爲之
奚必讀書破萬卷乎蒙叟深懲何李王李流派乃於明
三百年中特尊之爲詩老六朝人語云欲持荷作柱荷
弱不勝梁欲持荷作鏡荷暗本無光得毋類是與姑就
其集中稍成章者錄得八首送叔達之錢唐云夜雨維
舟數秋風解袂輕相逢畱客住同作送君行月色湖中

寺潮聲江上城知君游賞處相念若爲情雨中過伎家
飲書贈陳翠云紅樓細雨燕飛斜玉面珠簾相映遮三
月江南春色盡却行江北見梅花

吳夢暘字允兆歸安人有射堂詩鈔

虞山錢氏諡嘉定程孟陽曰松圓詩老謂能照見古人
心髓若親炙古人而得其指授歎爲古未有新安閔景
賢輯明布衣詩推歸安吳允兆爲中興布衣之冠是皆
阿其所好不顧千秋之公是公非以余觀二子之作以
政則魯衛以風則曹桮陳詩者不廢斯幸矣秋草云八

月幽并百草黃還聞一曲奏清商關河今夜皆寒色陵
寢前朝但夕陽久客自然迷道路後時能不畏風霜吳
兒莫說漂零易未到邊頭古戰場

謝兆申字耳伯邵武人有謝耳伯全集

晉江黃監丞明立序耳伯集稱其喜交異人購異書撫
異聞自墳典邱索經緯流略稗官瓌語靡不甄錄交游
既廣囊中裝半以佞佛半以市書有三十乘西僧舍已
散佚予嘗入閩購其手鈔張伯雨詩與世所傳者迥別
惜乎三十乘者悉蕩爲烟塵矣耳伯詩非不銳意法古

奈其辭鬱而不舒蓋耳伯璠嶺游吳首以詩文請業於
劉子威未免問道於盲宜其所就止此學者擇師誠不
可不慎爾

范汭字東生烏程人有范東生集

東生詩才嫺雅如靈犀結佩可以辟塵方之孟陽允兆
諸君覺尤騰拔琴川夜泊懷孫齊之云野宿次鳬鷺青
青荻笋齊潮痕隨月落山勢壓城低殘夢風前柝歸心
曙後雞還知高隱處只隔水東西盱江對月云新月出
江干郵亭獨倚闌別家如昨日二十一回看春日詵吳

允兆云遠樹微波黯不分閨闔城畔寄孤雲春來儘有
還鄉夢除却青山便是君閨宮詞云露華如水蘸宮牆
紅豆花兼荔子香多少蛾眉閒待月九龍帳底貯歸郎
四條絃上按新聲半是先皇手教成舊事內人誰敢洩
春來燕子不呼名

附錄韓子遠云東生論詩不可一世意所不協張髭
怒目誦誦詬詈及其苦吟收視反聽思極窅冥多清
微簡遠之句

吳鼎芳字凝父吳縣人後爲僧名大香字啞藍居

烏程之霞幕山與范汭交有披襟唱和集

附錄韓子蘧云東生茗產而僑寓吳門凝父吳人而
栖禪茗上東生好浮大白高談雄辯凝父丰神蘊藉
恬淡寡言其蹤跡雖殊而論詩相若

吳兆字非熊休寧人有金陵廣陵姑蘇豫章諸橐
非熊清而能麗綺而不靡最見賞於石倉其風調亦相
儷春游曲云細雨溼春泥流鶯幾樹啼東風淮水山落
日長干西夾道看馳馬圍塲下鬪雞倡樓今夜醉月出
管絃齊西河子夜歌云新著杏紅衫試騎赭白馬馬騎

堤路窄急爲扶僂下

沈野字從先吳縣人有卧雪閉戶燃枝榕城諸集
從先賣藥吳門曹能始賞其詩延致石倉園題所居之
室曰吳客軒寒食絕句云驚心芳草上河橋雨後推牕
見柳條廚下從來烟火少不知寒食是今朝最爲詩人
傳誦按孟雲卿云貧居往往無烟火不獨明朝爲子推
伍唐珪云慙媿四鄰教斷火不知廚裏久無烟則前人
久已道之矣其樂府能盤硬語頗饒古意短歌行云推
絃拂柱歌我浩曲浩曲未歌腸中蹴躑河中有船不載

客還尊中有酒不令客歡世人結交安得常好他鄉寄
食安得常飽士貧者賤客久者貧不如歸去偕我故人
邊詞云塞上風高獵馬稀天山六月雪花飛閨人不解
征人苦直到隆冬始寄衣

秦鎬字京汝南諸生有頭責齋詩

袁小修序頭責齋詩有云今人字皆兩字而京字獨一
字自東漢以下無之矣然自漢以降如顏之推字介李
曇字雲劉乾字天羅靖字禮房元齡字喬顏思古字籀
張巡字巡孫晟字鳳李條徐倫字堅毛欽字傑正難悉

數也

米雲卿字君夢湖廣人或云汴人徙家蘭溪後徙

居歸安之埭山

君夢晚寓吳興往來無定跡其撥悶詩云十年湖上社
雙屐柳東山有子癡難教無家老不還後卒于埭山之
枯木菴秋柳云搖落天涯正此時蕭疎多見路旁枝一
朝染露全無色何處含烟尚有絲漢苑也應隨日短隋
堤難道入秋遲陰陰滿眼河山暮愁絕那堪帶雨垂一
夜西風那便凋他鄉何處不蕭蕭依稀有葉還無葉搖

落長條復短條難忘折來情脉脉更愁看去路迢迢經
過若問傷心地涼雨寒烟鎖灞橋

徐允祿字汝廉蘇州嘉定學生有思勉齋詩編

汝廉抗言持論具有經世之術詩則非其所長

附錄愚山云天啓辛酉予官詹端汝廉貽書累萬言
謂正統己巳之役徐元玉得謀國大局而于廷益爲
孤注公等當早決大計勸請南遷定商家五遷之議
勿爲宋頭巾所誤甲申三月大命以傾豈知憂危慮
早乃自二十年前一老書生發之其風義有大過人

者

徐勣初字惟起更字與公閩縣人有鼇峰集

嚴儀卿論詩謂詩有別才非關學也其言似是而實非
不學牆面焉能作詩自公安竟陵派行空疎者得以藉
口果爾則少陵何苦讀書破萬卷乎與公藏書甚富近
已散佚予嘗見其遺籍大半點墨施鉛或題其端或跋
其尾好學若是故其詩典雅清穩屏去獍浮淺俚之習
與惟和足稱二難以此知興觀羣怨必學者而後工今
有稱詩者問以七略四部茫然如墮雲霧顧好坐壇坫

說詩其亦不自量矣

附錄南損齋云興公聚書至數萬卷所居鼇峰麓客
從竹間入環堵蕭然而牙籤四圍縹緗之富卿侯不
能敵也其考據精覈詩自樂府歌行及近體無所不
備

江逸字遺民休寧人有逋屋吟

遺民與馬時良仲良倡和里人目爲華屋詩老蘧公池
上云園經一雨再雨水接西邨北邨牧子驅牛避道僧
雛讓鶴鷹門

董斯張字遐周烏程人國子監生有靜嘯齋集

遐周初學詩於趙廣業及入閩心折曹能始歸與吳允
兆王亦房酬和是時公安景陵派盛行浙西風氣不盡
移易遐周洽聞周見與吾郡沈景倩略同詩亦相似嘗
以所作投前守吳季騶季騶寓書韓求仲云在郡兩年
不識有董生吳興守眼可抉也近得渠見贈詩如飛天
仙人不著一烟火字其傾倒若是讀曲歌云儂如一絃
琴獨絲纏相交歡如雙耳鼓慮爲他人搖十日不窺牖
後園花放齊薔薇刺儂衣蛺蝶投儂懷過桐江云薄暮

櫂歌聲看山不計程江晴船作市地僻縣無城蜃氣連
虹暗龍腥雜霧生釣臺猶可望緩楫未須行吳門道中
云柳花片片拂船牕雪點湖田鷺幾雙數到明朝寒食
夜半篷殘照過吳江初夏云楊柳陰濃曳碧烟一溪不
雨不晴天水樓處處凭紅袖吳下新來茉莉船

何允泓字孝穆常熟縣學生

孝穆詩頗嶽崑不沿時習讀元遺山集云滄海橫流著
此身中原天日照纍臣明昌大定三生夢欲叔希顏一
代人野史亭中遺汗簡讀書山下起埃塵幽蘭灰燼今

何在千載空餘老角巾讀張光弼集云畫省無心久握
蘭西湖花月一叢殘共傳軍府題詩客肯作吳藩入幕
官楊柳花時頻縱酒牡丹開後獨凭闌最閒園裏徵歌
處江左三人管幼安

薛岡字千仞鄞人有天爵堂集

附錄李杲堂云千仞年八十集其平生元旦除夕詩
爲一卷起萬歷庚辰至崇禎庚辰身爲太平詞客六
十年名重天下亦盛事也

唐汝詢字仲言松江華亭人有編蓬集

詩人形累者孫伯融跛偶武孟張節之謝茂秦眇視希
哲枝指何仲默禿筭其他不可悉數至唐仲言無目李
公起口啞耳聾兩君乃能勤於箋述不廢吟咏是難能
也

李峻字公起鄆人有盟鷗集

公起御史尚默之子生而耳聾十齡聞父訃號哭五晝
夜遂瘖嘗發先世遺書縱觀之上自國家典故名公鉅
卿前言往行下及器物之微靡不諳其本末侯官曹能
始合華亭唐仲言作二異人傳一以耳治一以目治咸

不惑於公安景陵之說世之號爲詩家者反不如瘖聵之指麾矣

文震孟字文起長洲人天啓壬戌賜進士第一授翰林修撰以言事鐫級崇禎初復原官歷中允諭德掌司經局右春坊進少詹事以禮部左侍郎兼東閣大學士卒諡文肅有葯圃詩橐

文氏自溫州守以來累葉風流儒雅爲士林所推相國晚達早歸崇禎五十輔臣骨鯁稱首烏衣子姓名節相繼不媿清門是難能也詩頗平緣擬古一章纏綿婉約

庶幾屈宋唐景之遺音乎

陳仁錫字明卿長洲人天啓壬戌賜進士第三授
編修累遷南國子祭酒追諡文莊有無夢園集

吳中甲第之盛前數嘉靖壬戌申文定王文肅同郡人
後則天啓壬戌文文肅陳文莊同縣人兩公皆老於公
車晚始登第而文莊爲先文恪萬歷丁酉所拔士至壬
戌復爲先公所錄及殿試則先公又充讀卷官蓋三試
皆出先公之門亦異事矣文莊以不肯撰魏璫鐵券文
落職可謂不負科名詩非所務一嚮染指未爲不知味

也

蔣德璟字若柳晉江人天啓壬戌進士改庶吉士授編修歷侍講諭德庶子掌司經局累官太子少保禮部尙書文淵閣大學士有敬日草

八公敏於掌故典禮治歷條奏詳明使其黼黻太平亦稱賢相惜乎未究其才或傳公吞金而死尙俟考實

馮元颺字爾敬慈溪人天啓壬戌進士知澄海揭陽二縣人爲戶科給事中歷官兵部尙書

萬歷二十九年二月庚午朔天津河御用監少監馬堂

進大西洋利瑪竇所貢土物時先太傅文恪公掌禮部
尙書事疏言會典止有西洋瑣里國而無大西洋其真
僞不可知又寄住二十年方行進貢與遠方慕義獻琛
者不同且所貢天主天主母圖旣屬不經而行李中有
神仙骨夫旣稱神仙自能獅舉安得遺骨此韓愈所云
凶穢之餘不宜令人宮禁者也乞速勒歸國勿許潛居
兩京與內監交往以致別生支節眩惑愚民疏進不報
後其徒湯若望以其國中歷法證大統之差徐官保光
啓篤信之會大時雍坊所建首善書院鄒忠介馮恭定

講學之所董其役者周忠毅宗建呂工部克孝時先大父楚雄知府以任子除都察院照磨竹頭木屑實司其勞書院成葉文忠撰記董文敏書之先大父業遷官故未書名于石也兩公講學事在天啓二年旣而御史倪文煥等詆爲僞學疏略曰聚不三不四之人說不痛不癢之話作不深不淺之揖噉不冷不熱之餅是年碎其碑暴之門外毀先聖栗主焚經籍於堂中崇禎初文煥伏法院僅存宮保率若望等借院修歷署曰歷局久之西洋人踞其中更爲天主堂至今不改矣馮公首善書

院感舊之作毋忝詩史

倪嘉善字迪之桐城人天啓壬戌進士改庶吉士授檢討遷司業歷中允諭德有媚筆泉集

崇禎己巳帝幸太學賜倪公坐講周易泰卦又嘗侍經筵講論語益者三友帝問孰爲益孰爲損對曰天子尙友在法堯舜而已帝爲改容公太僕卿贈工部侍郎應眷之子太僕天啓中請畱楊左尋削籍者也

倪嘉慶字篤之江寧人天啓壬戌進士除戶部主事歷戶科給事中晚爲僧名函潛又更名大然

有靈潭集

倪公治賦之才崇禎戊辰在樞部上言國計入不敷出
歲額缺至二百三十餘萬何以支持其言瞭若指掌假
令思陵此時聽公之言綢繆區畫則後此雖有水旱寇
賊尚可緩於危亡而惜乎不見納也旣而兵科給事中
劉微疏請裁驛遞有旨裁十之三省郵傳銀六十萬公
獨昌言曰驛遞之設貧民不能自食者賴之裁之太過
將鋌而走險此盜生之源也俄而李自成果以驛卒被
裁走入高迎祥隊中後遂以亡明朝野咸服公計慮之

遠云

王錫袞字龍藻雲南右衛人天啓壬戌進士改庶吉士授檢討歷侍講南國子司業諭德庶子祭酒以吏部左侍郎兼翰林學士

崇禎十四年八月太學當釋奠思陵有詔再臨辟雍於是罷遣閣臣及分獻官時龍虎山真人張應京適在都疏請入監觀禮尙書蔣公德璟暨王公咸持不可駁回十七日王公奉遣祭夕月壇二鼓始詣國子監十八日卯初刻駕自長安左門出由崇文街至成賢街入廟門

兩公導帝升階坐御幄內官持金餅金甌金鑪者六人
天漸明行釋奠禮畢幸彝倫堂祭酒南居仁講書臯陶
謨自天敘有典至敬哉有土司業羅大任講易咸卦尋
命賜茶文班自衍聖公及閣部共一十九人武班三十
八人分東西坐帝命禮臣將進士題名牌并石鼓悉摹
拓進呈又諭閣臣周程張邵朱六子不當槩置先儒之
列乃定議改稱先賢云是舉也蔣公紀之特詳今節錄
以證王公聖駕臨雍恭紀之作詩云乍挹方諸水來湘
泮水芹金樞澹華月玉露展蕭辰俎豆三千士都俞十

九人公庭看萬舞未許羽衣陳樸學臯謨古昌言聖主
聆硬黃墓獵碣淡墨捧名經胄子齊歡洽真儒足典型
自今隆祀典長照簡編青

齊心孝字君求桐城人天啓壬戌進士改庶吉士
授編修

太史賦詩無多與女郎沙蘭英章文玉定情答沙蘭英
貽鴛鴦枕云含情少婦倚銀缸繡罷鴛鴦日滿牕解得
世間離別苦故將好鳥織成雙一物相貽拳拳叩叩宜
其爲情死也

青志方書通 卷十一
三
喬可聘字君微一字聖任寶應人天啓壬戌進士
除中書舍人選授河南道御史有醉陶集

崇禎丁丑侍御巡按浙江既入境屬吏伏謁道左公首
詢先太傅第宅吏以鍾秀坊對旌蓋闐于藉袞之橋公
自巷左舍車徒行百步入自門升階肅衣冠拜祠下復
坦步出巷之右乃升車鼓吹導以行余總角時目擊其
事又六年武陵唐公紹堯分守嘉湖道入境亦展謁先
公祠則將及門而步入然禮容甚恭於時弟子敬其先
師若是由今觀之正可綴入觚不觚錄也

黃宗昌字長倩卽墨人天啓壬戌進士知雄縣調

清苑選授山西道御史

三殿告成論功行賞長倩時官御史上言國家名器盡爲闡寺收買腹心之助大行賓天在八月二十二日而殿工行賞在二十一日正彌畱大漸之時何暇出詔此輩直僞官爾詔令指名長倩乃舉黃克纘霍維華呂純如等六十六人以對請盡行削除是亦勇於觸邪者已七夕有懷云危坐撫佳節蕭蕭但雨聲閨中兒女態天上別離情秋入元蟬急年侵白髮生所嗟垂老意張角

總無成唐諺五角六張作事不成結句蓋用此語

吳振纓字長組歸安人天啓壬戌進士除中書舍人考授廣東道御史有顛石齋詩集

詠物詩最難工而梅尤不易林君復雪後園林纔半樹水邊離落忽橫枝此爲絕唱矣他如疎影橫斜水清淺暗香浮動月黃昏僅易江爲二字以竹桂爲疎暗是妙於點染者餘則蘇子瞻竹外一枝斜更好高季迪薄牒山家松樹下亦見映帶之工高續古絕句云舍南舍北雪猶存山外斜陽不到門一夜冷香清入夢野梅千樹

月明邨可謂傳神好手朱希真詞橫枝清瘦只如無但
空裏疎花數點李易安詞要來小酌便來休未必明朝
風不起皆得此花之神若朱雍之梅詞黃晞顏之梅苑
李龔之梅花衲釋明本之梅花百詠詩愈多而神愈遠
矣侍御棲賢看梅之作實獲我心詩云萬樹惟一色半
山堆白雲鳥啼邨不夜香遠客先聞近寺松陰合橫枝
澗影分誰家修竹裏簾外亦紛紛

何萬化字宗元青浦人天啓壬戌進士授南京兵
部主事歷禮部郎中升福建提學副使轉右參

政終廣東按察使

宗元仕閩爲制府畫策平劉香入楚同諸軍協力擒張
普薇是亦開濟之才不徒以雕篆見長者贈別云彩鶴
銀燈此夜親相看莫惜酒杯頻明朝茅店風霜苦縱有
盈觴不醉人

黃景昉字太穉晉江人天啓乙丑進士改庶吉士

授編修歷中允諭德庶子升少詹事以詹事掌
翰林院尋以禮部尙書入直東閣加太子少保
戶部尙書進文淵閣大學士

相君務去陳言專尙新警其近體尤雕繪如侍楚王宴
云隆準衣冠高帝後夥頤宮闕大江濱登太和絕頂云
天野星躔包兩戒國朝嶽瀆視三公南臺燕集云仙家
閨苑琉璃浦禹貢揚州篠簜田贈友云少從魯國稱男
子家近茅山得異人壽樊叟云公餘穉子燒松液酒半
材官舞蔗竿集北郭草堂云誰邀玉珮神仙客自唱清
歌菩薩蠻答友云枚叔賦游梁上苑伏生書重漢西京
寄友云以吾一日長乎爾如此三星粲者何要不作沿
襲語未央瓦云客來移甓漢時宮丞相經營想像中武

庫不隨蛇劒火鄴城空貴雀臺銅猶餘龍虎真人氣未
蝕蟲蠡累代功敢向玉池輕點染更無雄句似歌風書
事云內家驟括馬驟車火綫葦簾製也疎誰遣圓扉中
夜啓銀鐙又及老僧書

陸澄原字嗣端平湖人天啓乙丑進士除工部主
事歷員外郎謫順天府照磨遷大理寺副以兵
部員外被察閑住有芝房集

思陵初政職方首攻魏崔海內想其風采無難遽躋膺
仕而乃厭薄門戶不屑附東林其封事略云有市恩修

怨舉劾失平者雖東林亦可謂之小人不得以楊左爲
護身之符有特立獨行恪共厥職者雖非東林不失爲
君子不得以崔魏爲陷人之筭又云臣寧寡援孤立爲
硜硜之小人決不依草附木爲疑似之君子由是見嫉
於東林拒之惟恐不力一官贈蹬被察而歸放浪山水
以詩酒自娛斯狂狷之流也詩亦不入鍾譚流派溪外
一絕云短橋隱隱隔清溪溪外人家更向西行盡西溪
人不見一林修竹畫眉啼

熊開元字元年號魚山嘉魚人天啓乙丑進士除

崇明知縣譙吳江選授吏科給事中謫山西按察司簡較遷行人司副以言事廷杖削籍遣戍晚爲僧名正志字槩菴居蘇州之華山有華山紀勝集

魚山欲蒞宜興適思陵許奏事者於宏政門召對及入見宜興侍側因言軍事而出旣而召見德政殿輔臣亦入乃言曰易傳有云君不密則失臣臣不密則失身臣所言願輔臣暫退思陵諭曰輔臣管密勿能開元前所奏卿等皆與聞可以不退是日不敢盡言思陵命草疏

人仍有茶果餅餌之賜迨疏入遂被收思陵怒且不測
矣會姜公如農疏有皇上何所見而云然乎等語怒益
甚兩公受杖之苦用刑之慘其不死者幸也爰書旣上
思陵一曰讒譖輔弼再曰讒譖陰狡三曰謗毀狡肆人
皆疑思陵曲護宜與獨尹樞部宣子謂思陵時已恚宜
與命魚山具疏者度必列款欲據之便按問及見疏乃
曰如此不痛不癢思兩邊做好人邪蓋實怒其不力參
而反以誹謗大臣爲罪非思陵本意也斯言得之宣子
諱民興亦嘉魚人有菴園集詩務詭異多牛鬼蛇神語

不足存

又云華山在吳西偏相傳支道林銷夏之所劉宋時會稽守張裕舍宅爲寺縣志稱南渡乾道中祕書監張廷傑古爲別墅然范致能有華山寺詩云五湖西岼孤絕處梅檀大士來同住蒙泉新潔鑑泉明瀾茗羹藜甘似乳何須苦問蓮開未桂子萵花了今古三翁彩筆照青霞從此他山都不數我今閒行作閒客暫借雲牕解包具魂清骨冷不成眠徹曉跣趺聽粥鼓乾道中寺未嘗廢張氏別墅乃占斷閒田爾魚山華山紀勝詩序中仍

沿縣志附疏於此魚山華山鳥道卧獅石云從來入罨
歎崎嶇九折何如此路迂若是香林黑獅子向前翻擲
肯踟躕穿雲棧云盡日凝雲谷口封倦還飛鳥亦迷蹤
何如近借齋厨鉢鞭取耕烟白耳龍

朱治憫字子暇嘉興人天啓辛酉舉人選授肇慶

通判

子暇宣勞戎務一星卒殞天南生爲進表之劉琨死作
思歸之溫序其詩不沿時習磊落嶽奇至賣宅一律云
拮据經吾手書來已屬人一身猶長物四壁委微塵歌

哭今無地琴尊別有鄰庭梅應爲我望絕嶺南春悽惻
纏綿菴苑之草心實傷已

鄒龍采字聖昭歸安人天啓辛酉舉人婺川知縣
有高密堂詩集

聖昭雅尚清狂與烏程丁永鑑同舉於鄉酒分詩情最
相親臆丁有爲山閣詩大都北里冶游之作聖昭牽絲
入黔謁楚撫何公騰蛟公欲畱爲監紀辭曰朝廷命某
宰婺川不命參公軍事也及解組過楚何已殉難旣歸
祝髮入卞山不復與聞世事句如長江無六月驟雨不

崇朝明月幾時上歸雲未得閒花飛晴見雪竹密晝垂
陰殘雪重重白歸鴉陣陣圓暗泉蒙澗草驚鳥落山花
寺隨人意改身列上方閒成荒遲夜柝人定話歸潮非
蹈襲者所及

張次仲字元帖海寧人天啓辛酉舉人有待軒遺
集

先生晚隱郊廬高壘上履二之節詩有真意不盡規撫
古人月出一律云微涼今夕好月出正當門岼幘微風
至鉤簾清露繁客來宜卜夜吾醉孰畱髡軟語勞紅袖

頻催碧玉尊蘇邨題壁云鹽官城北郭溪東草屋蕭蕭
寒雨中瓜架豆棚新築圃長竿短笠老漁翁提攜小豎
敲茶臼勞苦山僧理藥籠吾老自應耽伏枕人前那敢
說冥鴻詠史云匕首投銅柱金椎中副車吾謀適不遂
天意復何如

錢嘉徵字孚于海鹽人天啓辛酉順天鄉試以國
子監生中副榜晚選授松溪知縣還自閩卒於
里有松龕剩橐

孚于以秋試畱國門首上書論魏忠賢十大罪自漢東

京宋南渡諸太學生後久無此風節矣或勸其勿上孚
于忼慨言曰虎狼食人徒手亦當搏之舉朝不言而草
莽言之以爲忠臣義士之倡雖死何憾自是言者相繼
而起元惡乃除信豪傑之士也福州口號云杜牧三生
憶舊游珠簾遮住一層樓此間真色無梳洗蕙箭開時
插滿頭

董守諭字次公鄞縣人天啓甲子舉人有董次公
集

次公於詩不屑寄人籬下然與風雅尙遠憶妻子柔云

與君隔山川邈然託素臆靜言想德容淵致若不測宛
然河汾生論文篤悃悃使我飢渴懷如飽秋稼穡斯文
儻我期願言求懿德

譚元春字友夏景陵人天啓丁卯舉鄉試第一有
譚子詩歸

鍾譚竝起伯敬揚歷仕塗湖海之聲氣猶未廣藉友夏
應和派乃盛行詩歸既出紙貴一時正如摩登伽女之
淫咒聞者皆爲所攝正聲微茫蚘竅蠅鳴鏤肝鉤腎幾
欲走入醋甕遁入蕩絲充其意不讀一卷書便可臻於

作者此先文恪斥爲亡國之音也桐鄉錢麟翔仲遠又
于友夏恒言詩歸本非鍾譚二子評選乃景陵諸生某
假託爲之鍾初見之怒將言於學使除其名旣而家傳
戶習遂不復言云讀曲歌云交歡久貝齒有時落歡獨
長在口得蜀中故人書云蜀川兵定人靜老友天寒信
來莫怪草堂深閉小橋邊有門開

靜志居詩話卷十八